

Van forsa mo umens a Berna?

Trais Grischunas han fin uss politisà en il cussegl naziunal

DA CLAUDIA CADRUVI / ANR

■ **Dapi 40 onns dastgan las dunnas votar e vegnan elegidas sin champ federal. Dapi 16 onns trametta il Grischun adina almain ina dunna en il parlament a Berna. Resta quai uschia?** 14 glistas han las partidas fin uss inoltrà a la chanzlia chantunala. 70 persunas candideschan per ils tschintg sezs grischuns en il cussegl naziunal: 53 umens e 17 dunnas. La buna novitad: Fin uss n'han las partidas anc inoltrà nagina glista senza dunna. Ina novitad main legraivla: Sin gnanca ina solia glista figureschan dapli dunnas che umens. Sulet trais partidas portan duas dunnas: la pcd, la ps ed ils giuvens socialistes.

Emblidan ins las dunnas

Enfin uss ha il Grischun gì mo trais dunnas en il cussegl naziunal a Berna, Elisabeth Lardelli (1974-1975), Silva Semadeni (1995-1999) e Brigitta Gadiant (dapi il 1995) che na candidescha betg pli.

Gadiant e Semadeni èn omaduas vegnidas elegidas ils onns novanta. Da quel temp faschevan las partidas stim che las dunnas obtegnian buns plazz sin las glistas ed ins aveva in tschert interess ch'ina u l'autra candidata vegnia propi elegida. Da preschent dattan las partidas pauca paisa a la promoziun da dunnas ed igl exista il privel che betg mo las partidas, mabain era ils electurs emblidan simpla-main las dunnas.

Fa Silva Semadeni la cursa?

Da las 17 dunnas che las partidas portan è Silva Semadeni (ps) quella che ha buns aspects da vegnir elegida. Ella ha gia experiencescha sco cussegliera naziunala ed è ina personalitad enconuschenta. Il



Candidates prominentas per las elecziuns dal cussegl naziunal: Beatrice Baselgia (ps), Elita Florin-Caluori (pcd), Anita Mazzetta (verds) e Silva Semadeni.

2007 ha ella recalgtà 15 000 vuschs sco candidata per il cussegl naziunal. Da tut ils candidats che van quest'atun en il cumbat e che avevan gia candidà avant quatter onns, ha sulet Hansjörg Hassler cuntanschi in meglier resultat che Semadeni.

Tuttina n'è la cursa anc betg fatga. Sin la glista socialdemocrata cadidescha era Jon Pult. Lez aveva cuntanschi mo 5200 vuschs il 2007, ma en il fratemp è el president da la ps grischuna ed entras quai blier pli enconuschent en il chantun.

Baselgia, Florin, Mazzetta

Las pli prominentas candidatas da quest'atun èn sper Semadeni era Beatrice Baselgia, Elita Florin ed Anita Mazzetta. Ma co erueschan ins in summa la prominenza politica? Ina pussaivladad por-schan ils archivs da gasetta.

En la colonna «pressa» (guarda tabelas agiuntadas) è inditgà quantas giadas ch'ina candidata è vegnida numnada entaifer ils dudesch ultims mais en las gasettas «Die Südostschweiz», «Bündner Tagblatt» e La Quotidiana.

Il pli grond resun ha gì la deputada e presidenta da vischnanca Beatrice Baselgia (ps). 106 giadas è ses num cumpari en las gasettas - entras la resgia a Domat dentant plitost en in context nunlegrai-vel. Il num da la presidenta da la pcd Elita Florin cumpara 101 giadas. La manadra dal WWF grischun Anita Mazzetta (verda) è 72 giadas en gasetta.

Sin in dumber mediocher vegnan la suppleanta Karin Niederberger (pld), la deputada Elisabeth Mani (pbd) e la deputada Agnes Brandenberger (33). Era Corina Hemmi cuntanscha mo 35 nominaziuns entaifer in onn. Ma sco trenadra cumpara ses num sin las paginas da sport, nua ch'ella po «recrutar» in nov tschertgel d'electurs.

Ils chavals da parada

Il status da prominenza da las dunnas è dentant da relativar e quai è svelt fatg, sch'ins cumpareglia el cun il dumber da nominaziuns dals candidats principals sin las glistas da partida. Lura daventa immediat cler, tgenins ch'èn ils chavals 01da parada dal cumbat electoral da quest atun. Sin la glista da la pcd vegn il deputà Vincent Augustin numnà il pli savens, numnadamain 161 giadas. Sin la glista da la pld ha Tarzisius Caviezel il pli grond resun cun 158 nominaziuns. Da cusseglier naziunal Hansjörg

Hassler (pbd) scriva la pressa 144 giadas.

Era il giuven president da la ps Jon Pult cuntanscha 150 nominaziuns entaifer in onn – Silva Semadeni vegn mo sin 29.

Il recept da Brigitta Gadiant

Che las dunnas grischunas n'èn betg mo da duvrar sco pegliavuschs, mabain ch'ellas san era far in sez, ha Brigitta Gadiant (pbd) demonstrà. Il 1995, 1999 e 2003 è ella vegnida elegida en il cussegl naziunal ed ha mintga giada fatg il segund meglier resultat dals elegids. Il 2007 ha ella fatg cun 22'500 vuschs il meglier resultat da tuts.

Tge è il recept per in tal success. En in'intervista che Gadiant ha dà questa primavaira a l'anr di ella: «Ins sto sez lavurar blier, s'infurmar ed empruvar d'obtegnair in sustegn lad. Ins sto esser preschent, sche pussaivel dapertut en ils novs meds da massa, cun brevs da lecturs ed ins sto nizzegiar tuttas pussaivladads en il chantun dad esser da la partida e sa preschentar. Mintga dunna sto sezza chattar ora, nua ch'ella ha sias fermezzas e flaiveltezzas, ma cuntunt las fermezzas ch'ella po render ve-saivlas.»

Chalzerar e bratgar

Ditg cun auters plets e forsa in pau pli salop che quai che la cussegliera naziunala s'exprima: Mintga dunna che vul cuntanscher in sez en il cussegl naziunal, sto far il medem sco in um cun questa finamira. I na resta nagut auter che da star sin ils pes davos, chalzerar d'ina occurrenza a l'autra, lavurar endinadamain ed empruvar da sa far enconuschenta e bainvesida en la speranza che uschè bliers electurs mettian ins sin il cedel d'elecziun.

Candidates sin glistas principalas

num	partida	domicil	pressa
Beatrice Baselgia	ps	Domat	106
Elita Florin	pcd	Panaduz	101
Anita Mazzetta	verda	Cuira	72
Karin Niederberger	pld	Malix	35
Elisabeth Mani	pbd	Tavau Vitg	34
Silva Semadeni	ps	Cuira-Araschgen	29
Renate Birrer	pcd	Lai	22
Valérie Favre	pps	Tavau Plaz	18
Tamara Pfaffen	verdliberal	Glion	2

Candidates da las glistas lateralas

num	partida	domicil	pressa
Corina Hemmi	pps	Cuira	35
Agnes Brandenburger	pps	Landquart	33
Tanja Bundi	pcd giuvna	Glion	7
Michel Yvonne	ps giuvna	Igis	7
Anja Pfister	pps giuvna	Cuira	5
Romina Beeli	pbd giuvna	Donat	5
Manuela Fetz	pld giuvna	Panaduz	3
Flurina Bezzola	ps giuvna	Puntraschigna	3